

# Lou viéi oustau en Ceveno

Ai vougu retrouva un pau de moun enfanço  
L'oustalet que jadis mi reire avien basti  
Fermamen acrouca au roucas de granit  
Qu'abrité dins lou tèms mi proumiero vacanço

N'ai passa lou lindau ; la grando chamineio  
Gardavo a soun cremascle lou peiroulet negrous  
Pendulado au clavèu la sartan castagniero  
De coustat dau tresped li cafiò cendrous.

Ai retrouva lou sòu de toumeto raspado  
A la muraio en caus, l'estanié adoursa  
Su la taulo de bos la dourgueto brecado  
E lou calèu d'estam à jamai amoussa

Sieu restado sens voues davans la poussierado  
Que teissavo un linçòu sus aqueu liò sacra  
Coumoulo de regret e l'amo desvirado  
N'ai pas pouscu alor, m'empacha de ploura

Ai buta lou voulet e l'er fresquet di faisso  
A penetra lis aisé emé tout l'aroumat  
Dis espi, roumanin, ferigoulo e mentasso  
I'en redouna l'alèn e lou parfum ama.

Li fusto dans plafoun an craqua de suspresso  
La porto dóu bahut sout mi det crussié  
La paniero a barrèu, la pastiero de fraisso  
An murmura moun noun, tout mé recouneissié

Emy Sarda